

09.03 MARELLA

«Mintgatant pens jau: come on, Corin, fa patgific!»

En sia carriera da 50 onns è Corin Curschellas ida als limits. Ella ha publitgà 13 agens albums, è preschenta sco musicista sin 99 auters albums, ha collavurà cun nundumbraivlas musicistas e musicists, concertà sin tut il mund e mess brava-main en moviment la scena da musica rumantscha. In'artista da talent nunditg saja Corin Curschellas, ina che haja l'abiltad da transfurmar l'entira vita en sun e tun. Quai noda l'anterior cumpogn da musica da Corin Curschellas, il trubadur grischun Walter Lietha, en in pled da laud per il giubileum da tribuna da 50 onns da l'artista. Tals plets da laud, liricas, memorias e fotografias ha ella publitgà dacurt en in cudesch. Quel è da chattar ensemen cun quatter discs en ina box da giubileum cun il num «Collecziuns: Her Songs 1990–2010+2022». Corin Curschellas, ch'è tranter auter vegnida undrada cun il Premi svizzer da musica da l'Uffizi federal



da cultura l'onn 2014, è oz surtut enconuschenta per sias novas versiuns tant finas sco frestgas da chanzuns popularas tradiziunalas rumantschas. Quellas ha ella arranschà e preschentà ils ultims dudesch onns en differentas furmaziuns. Sia lavur actuala metta il focus puspè sin la multifaradad, ina caratteristica da Corin Curschellas. Avant che Corin Curschellas va sin turnea da giubileum, raquintan ella ed intginas da sias cumpognas e da ses cumpogns en la «Marella» da sia vita da pioniera. D'ina vita per e cun la musica, da collavuraziuns sur cunfins, da viadis enturn il mund, dal dachasa e da la lingua rumantscha, da muments magics ed er main magics.

Redacziun: Olivia Spinatsch